



KEMENTERIAN SUMBER ASLI  
DAN KELESTARIAN ALAM

# KENYATAAN MEDIA

## PENAMBAHBAIKAN SOP AMARAN CUACA MET MALAYSIA

Kementerian Sumber Asli dan Kelestarian Alam (NRES) mengambil maklum kejadian ribut dan hujan lebat dalam tempoh beberapa hari kebelakangan ini yang telah mengakibatkan banyak kes pokok tumbang, kejadian banjir dan kemasuhan harta orang awam akibat ribut terutamanya di kawasan utara negara.

Saya juga mengambil maklum laporan media yang menyatakan Jabatan Meteorologi Malaysia (MET Malaysia) tidak mengeluarkan amaran cuaca disebabkan ramalan yang telah dikeluarkan lima hari terdahulu adalah masih lagi efektif.

Justeru, saya telah mengarahkan MET Malaysia untuk mengkaji semula SOP Penyediaan dan Penyebaran Maklumat/Nasihat/Amaran Cuaca supaya ia dapat dikeluarkan dengan lebih kerap apabila cuaca dijangka akan menjadi ekstrem dan melampau.

Pihak MET Malaysia juga telah diarahkan untuk menambah baik aspek komunikasi dalam penyebaran maklumat dan amaran cuaca yang lebih efektif. Ini bagi memastikan orang awam lebih cakna terhadap keadaan cuaca semasa dan sekaligus dapat mengelakkan kejadian yang tidak diingini.

Fasa Peralihan Monsun telah bermula minggu ini dan akan berterusan sehingga awal November 2024. Permulaan fasa ini menandakan berakhirnya Monsun Barat Daya yang telah bermula sejak 17 Mei 2024.

Semasa fasa Peralihan Monsun, rantau negara akan menerima tiupan angin lemah dari pelbagai arah. Situasi ini boleh menggalakkan kejadian ribut petir yang lazimnya membawa hujan lebat berserta angin kencang dalam jangka masa yang singkat, terutamanya pada waktu petang dan awal malam di kebanyakan kawasan di barat dan pedalaman Semenanjung, barat Sabah serta barat dan tengah Sarawak. Keadaan cuaca sebegini berpotensi menyebabkan banjir kilat, pokok tumbang serta kerosakan pada struktur yang tidak kukuh.

Orang ramai dinasihatkan untuk lebih berwaspada ketika tempoh ini dan sentiasa peka dengan ramalan dan amaran cuaca yang dikeluarkan oleh MET Malaysia melalui laman web rasmi, aplikasi mobil myCuaca dan media sosial rasmi Jabatan. Orang ramai juga boleh menghubungi Hotline Jabatan 1-300-22-1638 bagi sebarang pertanyaan lanjut.

**NIK NAZMI NIK AHMAD  
MENTERI SUMBER ASLI DAN KELESTARIAN ALAM  
26 SEPTEMBER 2024**